


Emprendists da miradur dattan ultima paluttada

Curs da preparaziun per ils examens finals dals emprendists da construcziun a Landquart

DA MARTIN CABALZAR

■ Dals 11 da matg fin ils 21 da zercladur han 39 emprendists da miradur e sis praticchers da construcziun dal Grischun d'absolver ils examens finals. Actualmain dattan ils emprendists da construcziun l'ultima paluttada a lur furmaziun cun absolver a Landquart in curs preliminar da preparaziun per ils examens finals. Dapi intgins onns porscha l'Associaziun grischuna dals impressaris constructurs, timunà actualmain da Markus Derungs, avant ils examens finals in curs preliminar che chatta gronda accoglientscha tant tar ils emprendists sco tar ils patrums. El lubescha da far ina bilantscha da la situaziun curt avant ils examens finals. Ils resultats da quest curs furman ina buna basa per pudair prender a mauns a moda effizienta l'ultima fasa da la preparaziun per ils examens. La furmaziun professiunala per miradurs cuzza trais onns, quella per praticchers da construcziun dus onns. Ella succeda en il rom dal sistem da furmaziun trial che consista da pratica en ina interpresa da construcziun, la scolaziun professiunala a la scola da mastergen ed ils curs surregionals organisads da l'Uniu chantunala dals impressaris da construcziun. La scola professiunala intermediatescha las enconuschientschas da professiun ed ils roms da furmaziun generala, ils curs introductivs entruideschans ils emprendists en la pratica rudimentara da la clamada ed il manaschi d'emprendissadi è responsabel per la concretisaziun da la materia da basa en la pratica.



A Landquart fan emprendists da miradur e da praticchers da construcziun actualmain las ultimas preparativas per ils examens finals che cumenzan en in mais.

MAD

Impurtanta bilantscha da la situaziun

La furmaziun en il manaschi professiunala basa sin l'ordinaziun da furmaziun per las professiuns da miradur EFZ e da praticchers da construcziun EBA. En quellas vegn reglà tant ils cuntgns sco la struc-

tura da la furmaziun professiunala da las clamadas numnadas. Cun l'agid da rapports da furmaziun examineschan ils patrums ed ils emprendists periodicamain il progress da la furmaziun.

Sco ulteriura pussaivladad da far ina bilantscha da la situaziun anc avant la

procedura da qualificaziun ha l'Uniu grischuna dals impressaris da construcziun introduci avant intgins onns in curs preliminar curt avant ils examens finals. Il curs da quest onn stat sut il titel uffizial «curs preliminar per la procedura da qualificaziun», sa reparta en quatter gruppas,

stat sut l'egida dad Albert Disch (Aschera) ed ha lieu dals 3 fin ils 26 d'avrigl 2017. Sco quai ch'il gestiunari da l'Uniu grischuna d'impressaris Andreas Felix è s'exprimi envers La Quotidiana frunta quella offerta dals impressaris grischuns sin buna accoglientscha tant tar ils patrums sco tar ils emprendists. La Fabrica da tievlas a Landquart na metta betg mo a disposiziun l'areal necessari per quests curs, mabain ella porscha era gratuitamain il material da construcziun necessari, quai che correspunda mintgamai ad ina summa considerabla. Plinavant vegnia il curs legraivlamain era sustegnì da pliras interpresas ch'èn commembras da l'Uniu grischuna d'impressaris, sinceresch Felix.

Sut cundiziuns d'examen

Durant trais dis obtegnan ils emprendists la pussaivladad da realisar in object d'exercizi sut cundiziuns simuladas d'examen. L'object vegn alura validà dal manader da curs tenor ils criteris che vegnan applitgads en la procedura da qualificaziun dals examens finals. Las experientschas fatgas en il decurs dals onns passads mussan ch'ils resultats cuntanschids al curs preliminar correspundan fitg bain cun ils resultats ch'èn la finala vegnids cuntanschids en ils examens finals. Da quai resorta che quest curs preliminar correspunda effectivamain ad ina situaziun d'examen che lubescha alur als patrums ed emprendists da sa preparar specificamain ed intensivamain en l'ultima fasa che resta sin ils examens avant porta, accentuescha Felix concludend.